

TEZAU LITURGIC

10 IUNIE

ACATISTUL SF. IERARH IOAN MAXIMOVICI, MITROPOLITUL TOBOLSKULUI ȘI ÎNTREGII SIBERII II



MOSCOVA, 2000



АКАФИСТ ИЖЕ ВО СВЯТЫХ ОТЦУ НАШЕМУ ИОАННУ МИТРОПОЛИТУ ТОБОЛЬСКОМУ И ВСЕЯ СИБИРИ ЧУДОТВОРЦУ

Кондак 1

Возбранный чудотворче и премудрый пастырю,
свительниче Божий, осиявый страны
Сибирския. Восхваляем Тя любовью о чудесех
Твоих радующесе. Ты же предстояй невечерней
славе Царя Небеснаго, моли от всяких бед
сохранитися поющим Ти
Радуйся, святителю отче наш Иоанне,
Сибирский чудотворче.

Икос 1

Ангельски возжег еси священный пламень веры
в Зиждителя Премудраго, возлюбил еси малых
сих, ихже Бог Слово братиею Своею нарицает,
темже и Ангелы удивил еси преславным житием
Твоим. Мы же покланяся Ти, Святый отче
взываем:
Радуйся, твердый каменю веры православныя.
Радуйся, светоче любве христанския.
Радуйся, правды Христовой служителю.
Радуйся, истины Божия носителю.

Радуйся, прославивый Отца Небеснаго добрыми
дела Твоими.

Радуйся, во славе Божией царствуй со всеми
Святыми.

Радуйся, любовь Твоею объемляя
страждущия.

Радуйся, молитвою Твоею спасаая погибающия.

Радуйся, святителю отче наш Иоанне,
Сибирский чудотворче.

Кондак 2

Видя житейское море вздыгаемое бурей
напастей, к тихому пристанищу обители
Печерския притекл еси крестолубче и
отрекшися тленнаго мира, Вечному Богу воспел
еси: Аллилуиа.

Икос 2

Разум чист от Бога Тебе даровася отче Иоанне, и
Ты яко верный раб, делавый и трудивыйся,
умножил еси благодати талант; темже призва Тя
Господь в радость вечную. Мы же поем Ти
Богомудре:

Радуйся, чистоту ума Твоего сохранивый.

Радуйся, бдением и пощением страсти плотския
умертвивый.

Радуйся, лукаваго смирением победивый.

Радуйся, нетленное богатство получивый.

Радуйся, сердце великое в терпении имевый.

Радуйся, орле, воспаривый к небу умозрением.
Радуйся, странниче пути крестнаго.
Радуйся, наследниче Царствия Небеснаго.
Радуйся, святителю отче наш Иоанне,
Сибирский чудотворче.

Кондак 3

Силою Креста неустрашимо боролся еси,
преподобне Иоанне, противу князя мира сего,
воинствуя за Церковь и водружая знамение
победы Христовой с песнею: Аллилуиа.

Икос 3

Имея неоскудное милосердие ко всякому
человеку, отче Иоанне, явился еси скорбящим
утешение, заблудшим вразумление, обидимым
заступление, о сирых и вдовицах неусыпное
попечение и всем помощник во спасении;
благодарим о Тебе Бога, дивнаго во Святых
Своих и Тебе приносим пение сие:

Радуйся, волю Твою, воле Божией сочетавай.

Радуйся, верою благодать познавай.

Радуйся, благодатию добродетели стяжавый.

Радуйся, всего Себе нищим отдавай.

Радуйся, в милости неизменный.

Радуйся, врачу безмездный.

Радуйся, немощным, яко Себе послуживый.

Радуйся, истинно Христу угодивый.

Радуйся, святителю отче наш Иоанне,
Сибирский чудотворче.

Кондак 4

Бурю зависти воздвиже лукавый в сердце рабов
самолюбия и научи гордых клеветати на Тя пред
Цари, да погубит дело Твое поборниче
благочестия; Бог же изведе правду Твою, яко
свет, и спасе Тя во смирении поюща Христу:
Аллилуиа.

Икос 4

Слыша стенания бедствующих во дни глада,
призвал еси духовная чада Твоя с Тобою хлеб
насущенный раздовати требующим, добрый и
бодрый пастырю; души человеческия от глада и
вечныя смерти спасаая, темже в честь и славу
приими пение сие:

Радуйся, хлебом небесным насыщенный.

Радуйся, питием бессмертия напоенный.

Радуйся, Бога Слова ученик неизменный.

Радуйся, Духом Святым осененный.

Радуйся, Отцу Небесному всыновленный.

Радуйся, Пресвятыя Троицы храме
одушевленный.

Радуйся, от бед и скорбей избавление.

Радуйся, лукавых сердец исправление.

Радуйся, святителю отче наш Иоанне,
Сибирский чудотворче.

Кондак 5

Богоразумия звездо, возсиял еси во тьме неведения, отче Иоанне, лучами Евангельскаго учения проникая в сердца человеческия и подвизая всех воспевати Солнцу правды Христу: Аллилуиа.

Икос 5

Видя мрак неведения покрываяй человеки, богатство учения Христова расточил еси щедро; и неустанно трудился еси, отче Иоанне, почерпая силу в молитве от источника премудрости. Сего ради почитаем Твою светоносную память, взывающе:

Радуйся, украшенный сединою любомудрия.

Радуйся, позлащенный добродетелию смиренномудрия.

Радуйся, Богодухновенный учителю.

Радуйся, духовнаго просвещения покровителю.

Радуйся, яснотекущая струя Боговедения.

Радуйся, истиннаго Света проповедание.

Радуйся, яко отроки умудряеши.

Радуйся, яко младенцам разум открываеши.

Радуйся, святителю отче наш Иоанне,

Сибирский чудотворче.

Кондак 6

Проповедник славы Божией делом и словом был еси, отче Иоанне, темже Тя избра преемника

Себе святитель Феодосий, с Ним же во Царствии Небеснем поеши: Аллилуиа.

Икос 6

Возсиял еси в дому Божии, светильниче Христов Иоанне, егда избраша Тя вернии во архиерея, по блаженней кончине Святаго Феодосия. Его же паству верно упасл еси, поющу Тебе:

Радуйся, яко одея Тя премудрость безлетная.

Радуйся, яко украси Тя красота пресветлая

Радуйся, в ризу спасения облеченный.

Радуйся, владыко смиренный.

Радуйся, венцем славы венчанный.

Радуйся, пастырю избранный.

Радуйся, овцы Твоя сохранивый.

Радуйся, подвиг любве совершивый.

Радуйся, святителю отче наш Иоанне,

Сибирский чудотворче.

Кондак 7

Хотя получить небесную славу, блаженне Иоанне, написал еси книги, в них же научаеши верныя уповати на Бога и в скорби пети Ему: Аллилуиа.

Икос 7

Новый чудотворец святитель Феодосий болящу Ти, отче Иоанне, явился и повеле Тебе совершати литургию. Ты же абие востал еси от одра болезни

здра и вознесл еси благодарение Христу, о сем радуяся поеми Ти:

Радуйся, таинниче молитвенныя сладости.

Радуйся, хранителю благодатныя радости.

Радуйся, в скорби и болезни Небеснаго Врача призывай.

Радуйся, по вере Твоей исцеление приявй.

Радуйся, благоухания цвете возрастый в безсмертие.

Радуйся, яко высоту жития Твоего посрамися нечестие.

Радуйся, яко призывающим Тя помогаеши.

Радуйся, яко в сонях и видениях верныя посещаеши.

Радуйся, святителю отче наш Иоанне,
Сибирский чудотворче.

Кондак 8

Странное чудо видим в Тебе, Богоносе Иоанне, Ты бо в старости юных исполненный сил послужити Христу в Сибирь пришел еси, вещание же истины православия от Тебе изыде до Китая, и новии люди Божии научишася пети: Аллилуиа.

Икос 8

Весь был еси в Бозе, Его же проповедал еси во стране изгнания, умножая стадо спасенных, темже Церковь величает Тя поюще:

Радуйся, от идол ко Христу обращающа.
Радуйся, иконами Богоматери духовных Твоих
чад благословляюща.
Радуйся, ибо хладную Сибирь благодатно
согреваеши.
Радуйся, ибо ночь скорбей отгоняеши.
Радуйся, яко всем состраждаеши.
Радуйся, яко правилом жития Твоего всех
назидаеши.
Радуйся, темниц посетителю.
Радуйся, истинный Христов служителю.
Радуйся, святителю отче наш Иоанне,
Сибирский чудотворче.

Кондак 9

Все Твое сердце отдал еси во исполнение
Евангельския правды, темже многая добрая
дела совершил еси, Боголюбивый отче, в краткое
время служения Твоего в Тобольске, тайно
благотворя и узники посещая во имя Иисуса
Христа, Ему же всех призываеши пети:
Аллилуиа.

Икос 9

Витийство человек не может сложити достойную
похвалу Святыни Твоей, отче, яко Сам Бог
прослави Тя чудною кончиною жития Твоего,
юже провидя, совершил еси литургию и,
послужив трапезе нищих в дому Твоем,

уединися на молитву и тако отошел еси ко
Господу, пред иконою Богоматери склоняся; мы
же исходную поем Ти песнь во умилении:
Радуйся, уснувший плотию на земли.
Радуйся, живой душею на небеси.
Радуйся, со Апостолы Христу поклоняйся.
Радуйся, со мученики венчайся.
Радуйся, в соборе Святых отец сияющий.
Радуйся, в лике преподобных воспевающий.
Радуйся, икону Богоматери даровавший
Тобольску во благословение.
Радуйся, яко сия чудотворная икона наше
ограждение.
Радуйся, святителю отче наш Иоанне,
Сибирский чудотворче.

Кондак 10

Спасение душам нашим испроси, отче Святой
Иоанне, да возсияет правда и мир посреде
паствы Твоея и в Церкви велицей воспоем Богу:
Аллилуиа.

Икос 10

Стена еси бедным и сиротствующим, утешение
наше во дни скорби, исцеление недугующим,
просвещение слепотствующим. Сего ради,
припадая ко Святыне Твоей, поем Ти:
Радуйся, ибо дело земнаго Твоего жития
продолжаеши.

Радуйся, ибо на страже спасения нашего пребываеши.

Радуйся, постниче и молитвенниче злыя духи изгоняяй.

Радуйся, девственниче, разслабленные укрепляяй.

Радуйся, Божий светильниче, зрение уясняяй.

Радуйся, проповедниче веры, слух исцеляяй.

Радуйся, яко мнози припадают к Тебе освящаемии.

Радуйся, яко издалече молятся Тебе спасаемии.

Радуйся, святителю отче наш Иоанне,
Сибирский чудотворче.

Кондак 11

Пение сие, яко дар смиренный приими от нас, отче Иоанне, и совершенный дар любви нам испроси, да узрим славу Божию и в небесах услышим: Аллилуиа.

Икос 11

Светозарное солнце, возшедшее во тьме греховней зришися, отче преподобне, живой бо во веки дарова Тебе власть и по смерти изгнати демонов и собирати верных на молитву, темже двести лет притекаху ко гробу Твоему людие и завещаху роду грядущему величати Тя:

Радуйся, ибо тучи неверия разгоняеши.

Радуйся, ибо мрачныя души верою озаряеши.

Радуйся, ибо надежду спасения оживляеши.
Радуйся, ибо отчаянных спасаеши.
Радуйся, яко падшия ны возставляеши.
Радуйся, яко унылыя воздвизаеши.
Радуйся, ибо всяку слезу бедствующих
отъемлещи.
Радуйся, ибо слезы покаяния исторгаеши.
Радуйся, святителю отче наш Иоанне,
Сибирский чудотворче.

Кондак 12

Благодать исцеления пролияся от Святых мощей
Твоих, отче Иоанне, и собращася от всех концов
земли Российския чада Твоя под сению матери
Церквей Сибирских на место погребения Твоего
и возопиша Богу: Аллилуиа.

Икос 12

Поюще милостиваго Бога со светом в душе и
горящими свечами в руках, сретоша вернии
честныя и многоцелебныя мощи Твоя,
преподобне Иоанне, архиереи же пронесоша их
окрест Софийския Церкви, тогда со слезами
умиления видеша вси, яко небо и земля
сторжествуют с нами трепетно взывая:
Радуйся, Ангелом сожителю.
Радуйся, Горния Церкви служителю.
Радуйся, паствы Твоея покровителю.
Радуйся, ибо пред Твоею чудною иконою

Богоматери паки возлежиши.
Радуйся, яко Первообразную лицезриши.
Радуйся, яко Пресвятей Троице предстоиши.
Радуйся, принося о нас пред Бога кадило
умилостивления.
Радуйся, ходатаю нашего спасения.
Радуйся, святителю отче наш Иоанне,
Сибирский чудотворче.

Кондак 13

О, великий святителю Иоанне, прими моление
сие наше и, принося его ко престолу
Всевышняго, испроси православней стране
нашей мира и веры утверждения, людем же
царствия Божия и оправдания пред очима
страшного Судии поющим: Аллилуиа.
(сей Кондак читается трижды, за тем Икос 1 и
Кондак 1)

